

四庫全書

子部

欽定四庫全書

子部

珊瑚網卷二十七

五至

詳校官中書臣沈鳳輝

編修臣程嘉謨覆勘

總校官進士臣朱鈴

校對官檢討臣李鼎元

謄錄監生臣頃朝槐

欽定四庫全書

珊瑚網卷二十五

明 汪珂玉 撰

名畫題跋一

晉顧凱之洛神賦圖

長康畫宓妃卷重著色人物衣折秀媚樹石奇古絹素  
破裂尚是宋裱世稱虎頭三絕允為繪事珍秘

劉宋陸探微姜后免冠圖

古免冠進諫圖周宣王姜后故實也劉宋時吳人陸探微所作其法遒勁傳色清潤人品端莊神氣超越六法具備出乎天成蓋世傳探微乃畫中之聖者也此卷希世之珍畫入神品其故實誠有補于風教觀之者使齊家治國咸有助焉駙馬都尉公當以十襲珍藏使子孫永保珍貝珠玉不足貴也元祐三年八月提舉太平興國宮賜紫金魚袋王至跋

隋展子虔畫

黃山谷題云人間猶有展生筆事物蒼茫烟景寒常恐  
花飛蝴蝶散明窻一日百回看

展子虔乃大李將軍之師余家所藏人物卷最為奇古  
唐閻立本諸夷圖

閻立本總章元年拜右丞相封博陵縣公有應務之才  
兼能書畫時天下初定異國來朝詔立本畫外邦人物  
此圖是也李嗣真云自江左陸謝云亡北朝子華長逝  
象人之妙號為中興至若萬國來庭奉塗山之玉帛百

蠻朝貢接應門之敘位折旋矩度端簪奉笏之儀魁詭  
譎怪鼻飲頭飛之俗盡該毫末備得神情故朝廷號為  
丹青神化與兄立德同在上品云 臨漢魏泰道輔記  
右圖起武興止狼牙脩計國二十六為人二十八具列  
國狀貌道輔嘗有東軒筆記行于世

吳道子鍾馗元夜出遊圖

款云臣吳道子奉旨畫

君不見元宵春夜玉京口魑魅陸離山怪吼髯夫當前  
驚婦後嬌姿百媚門楣秀大鬼跳梁山鬼波毬燈百戲

舞且歌歡聲騰沸笑聲雜月光瑩白燈光多腊鬼作梁  
負鬼驅虹霓可駕雷可車雷奔霧集効勞勩崢嶸齊力  
彊肩輿旗鎗散漫非尋常人間此夜樂未央金吾不敢  
禁行迹乃知馮心方且剛斬馘妖邪祛瘴穢驚散鬼魂  
心胆碎乾坤清謐正氣淳一睹儀容生者畏想當唐室  
夢見時道子丹青親寫之披覽此圖殊慷慨醉裏揮毫  
為賦詩 青城山人

終南老馮狀酖醺虎韉烏弁鳴色袍青天白日不肯出

上元之夜始出為遊遨鬼門關頭月輪高烏捷背穩如  
駟駒鬼婦塗兩頰鬼子垂一髦徒御雜沓聲嗽嘈導以  
靈姑旗翼以大食刀茶壘左執鞭質矯右屬橐方明前  
持漆燈張若後擁犖旄離朱罔兩不可一二數肩擔背  
負手且操奇形獐色使人怕一似樞駁梟獍兼猿猴戰  
場人血化燐火各出照地點點如焚膏陰風颯颯笑荒  
臯百怪屏氣不敢號汝輩遠遁莫我遭我欲飲汝血甘  
如飲醇醪我欲啗汝肉美如啖羊羔肯容汝輩在世長



貪饕吁嗟乎老馮真為百鬼中一豪所以唐皇想其像  
詔令道子寫以五色毫吾嘗疑其事展圖再把短髮臨  
風搔憶當天寶年左右皆鬼曹太真宮中逞狐媚祿山  
殺上作虎嘯當時使有老馮者安得縱彼二鬼逃便須  
縛以蒼水使者之赤絛獻于天閤尸諸獸牢寢其皮拔  
其毛效爾一日驅馳勞坐令溫泉生汙泥驪山長蓬蒿  
上除唐家百年害下受唐史千年褒却來上元夜任爾  
燒燈并伐罄 長洲吳寬

君不見昔日開元全盛時  
君王圖治世清夷絕地天通  
幽明遠舉朝盡是臯與夔  
天寶已後君心憊夢寐時時  
見妖怪當時玉笛最所欣  
有鬼盜之君獨斷終南進士  
名鍾馗藍袍破帽真黃眉  
自言能除虛耗鬼剗目劈啖  
如療飢奔魑走魅驅罔兩  
土逐羶羊水罔象千妖百怪  
匿其踪遂令道子圖其像  
嗟哉此圖更奇特不比當時  
舊遺墨如何却作上元遊  
醉眼摩娑諸鬼側青陽轉春  
東風遲風和月白流春漸  
玉花老梅含野姿垂楊拂水

搖烟絲屬族相隨恣歡笑上下燈光炯相照魔騰鬼趯  
不得寧牛背穩騎無翫翫我觀此圖誠荒唐陳君得之  
奉高堂但祝除君虛耗鬼何須向其攜家出遊有無之  
行藏 姑蘇顧餘慶

吳道子鍾馗圖衣紋筆勢皆有顧虎頭陸探微法東坡  
所謂筆所未到氣已吞真奇品也 董其昌觀因題

內教博士勢至像

世稱道子筆法超妙為百代畫聖早年行筆差細中年

行筆磊落如蓴菜條人物有八面生意活動其傳采于  
焦墨痕中略施微染自然超出縑素世謂之吳裝觀此  
大勢至像信然 平陽世賢子識

摩詰奕棋圖

在絹素上卷首五大字為李西涯公篆書鈐縫有政和宣和二方印

摩詰本詩人精思詣元化緒餘臻畫妙遂方吳子駕寫  
成三士奕棋圖意態蕭然各閒暇儒冠羽服對紋楸老  
僧傍睨成可詫形如槁木心死灰豈識枰中有機獲抑  
亦至人聊自適肯效澆風生變詐歷唐默計五百年一

著指間猶未下樵丁不獨爛斧柯閱世紛爭幾王霸乃  
知非人看畫畫看人今古滔滔等晨夜俯仰跡已陳電  
掣明窓罅宣和殿中嘗寶玩題品愈重千金價當時內  
府收欲觀誰敢借流落長存天地間在在護持宜有神  
物為憑籍 漢郡蒲道源

鼎立門庭理一同何須局面互爭雄誰知奪角衝關事  
都在山僧冷眼中 吳僧白雲英

王維雪溪圖

宋徽廟宸  
翰題簽

蓬萊山道人間風日不到玉笈金鑰典秘甚嚴有平生  
畜眼未嘗老天旋地轉散落委棄故人李君祥得之出  
以示余其犀玉已被剔取所幸畫無恙耳展玩之餘不  
覺涕淚闌干蓋歎是圖之不遭也請靳固之以待異日  
萬金之購云 蓬山道人劉詡題

治平二年正月十九日沈邁章岵晏崇金山同觀

余於三十年前獲觀右丞此幅僅盈尺有咫設色高古位  
置幽遠有刺篙濟渡者有牧奴驅豕而歸者神彩溢目餘

所見皆優孟也今在一友處命庸工所裝一時粉墨狼藉  
神氣索然偶復見之惋悵累日 墨林項元汴

此卷歸程李白入唐宋元寶繪冊二跋俱截去

王右丞江山雪霽圖

畫家右丞如書家右軍世不多見余昔年于嘉興項太  
學元汴所見雪江圖多不斂染但有輪廓耳及世所傳  
摹本若王叔明劍閣圖筆法大類李中舍疑非右丞畫  
格又余至長安得趙大年臨右丞林塘清夏圖亦不細

皴稍似項氏所藏雪江卷而竊意其未盡右丞之致蓋  
大家神品必于皴法有奇大年雖俊爽不耐多皴遂為  
無筆此得右丞一體者也最後復得郭忠恕輞川粉本  
乃極細謹相傳真本在武林既稱摹寫當不甚遠然余  
所見者庸史本故不足以定其畫法矣惟京師楊郵州  
將處有趙吳興雪圖小幀頗用金粉間遠清潤迥異常  
作余一見定為學王維或曰何以知是王維余應之曰  
凡諸家皴法自唐及宋皆有門庭如禪燈五家宗派使



人聞片語單詞可定其為何派兒孫今文敏此圖行筆  
非僧繇非思訓非洪谷非關仝乃至董巨李范皆所不  
攝非學維而何今年秋聞金陵有王維江山霽雪一卷  
為馮開之宮庶所收亟令人走武林索觀宮庶珍之如  
頭目腦髓以余有右丞畫癖勉應余請清齋三日始展  
閱一過宛然吳興小幀筆意也余用是自喜且夙世謬  
詞客前身應畫師余未嘗得覩其跡但以想心取之果  
得與真有合豈前身應入右丞之室而親攬其礪礪之

致故結習不昧乃爾耶庶子書云此卷是京師後宰門  
拆古屋于折竿中得之凡三卷皆唐宋書畫也余又妄  
想彼二卷者安知非右軍跡或虞褚諸名公臨晉帖也  
儻得合劍還珠殊足辦吾兩事豈造物妬完耶畀余於  
此卷中消受清福耶 萬歷廿三年歲在乙未十月之  
望秉燭書于長安客舍董其昌

甲辰八月廿日過武林觀于西湖昭慶禪寺如漁父再  
入桃源阿閼一見更見也 董其昌重題

馮開之快雪日記云吳崑麓夫人與予外族有葭莩之  
親偶攜此卷見示述其先得之管後宰門小火者家有  
一鐵樅門門或云漆布竹筒搖之似有聲一日為物所  
觸遂破墮三卷此其一也然雙槐歲抄有云純皇好玩  
名畫古器南京西華門舊有二黑漆圓橫振之則中空  
有聲蓋國初巨室之籍入者以不可啟視故棄于此守  
閤小內史張本穴而窺之則畫幀存焉一為王維傳色  
山水約三文餘一為蘇漢臣所繪宋高宗瑞應圖本以

王畫送安寧蘇畫送黃賜皆太監坐殿守備者未幾寧  
死賜攫得之併以獻上賞賚甚厚並加寵任是二事何  
相符至此然雪霽圖有沈石田跋或即張本所得而流  
傳至北好事者重局秘之偶入小火手耶此卷海內推  
為墨王自有神物護持之也 繡里汪砢玉先得臨本  
復見真本跋

王維小簇山水

唐玄宗既命李思訓吳道子各圖嘉陵山水于大同殿

壁王維又別用絹素寫之謂之小簇茲所圖山水具嘉陵三百里之勢正小簇法也一室之內覺江山萬里非遙自韻子珂玉識

摩詰本輞川圖

王右丞輞川圖與余昔在杭苕故家見者一樣前有集賢院御書印內合同印題摩詰本後書河北郭忠恕奉命復本則知為江南李後主時臨本也虎賁中郎更無辨處郭亦妙筆矣右丞唐開元天寶朝士名維字摩詰工

詩畫輞川其所居自寫為圖精密細潤在小將軍著色山水右今如魯寶玉大弓絕無僅有吾昂霄珍之重之攜上天京名公相一見賞識鑒定價增十倍 大德戊戌冬至廬陵民八十叟李珣元暉跋又詩

園圖親畫早流傳已是人間五百年凝碧池頭秋句在當時幾負此林泉

輞川圖本二本此從矮本所臨畫格高絕觀此猶有

生意為賦短句

袁桷

清容字伯長

詩中傳畫意畫裏見詩餘山色無還有雲光見復舒前  
溪漁父宿舊宅梵王居千古風流在披圖儼起予

摩詰嘗與裴迪倡和廿世紀輞川之勝至今讀之如  
身遊其間此本甚精緻尚可想見其景與詩會之時  
也因追而和之

孟城坳

春風孟城坳年年自花柳當日倦遊人何處談空有

華子岡

蜿蜒浮速空慘澹凝古色出雲亦何心既雨返無極

文杏館

種杏白雲間因之葺茅宇鴛聲烟中曙虎跡夜來雨

斤竹嶺

苞竹秀孤嶺虛瀨涵清漪秋風何時實鳳飢竹不知

鹿柴

崖巖石林稠谷靜山泉響麋鹿圓其間攸伏息下上

木蘭柴



手折木蘭花  
心憶懷沙侶  
墜露玉可和  
金盤差蒂所

茱萸泚

茱萸綻紫粟  
白雲封不開  
似待陶元亮  
共把菊花杯

宮槐陌

屯雲應廣陌  
零露濕古苔  
中街日停午  
四面風徐來

臨湖亭

積水涵倒影  
萬象凌虛來  
魚在山中泳  
花從天上開

南垞

亭亭一風榭脫履席可即階前白雙鶴相迎似相識

歌湖

岸中臨水逆酒醒呼隱君收絳玉梭起搖蕩空中雲

柳浪

年年黃金縷照影麴塵漪誰為南浦贈紉佩扈江蘼

樂家瀨

鑿鑿沸白喧浩浩空清瀉漁翁互相呼放船莫輕下

金屑泉

洗耳山下泉永念童蒙歲敢希作聖功事心如事帝

白石灘

湍駛風逾清水明石可把倚杖獨移時白鷗翩然下

北垞

波影媚松樾山色麗石闌留連南川月不肯下雲端

竹里館

此君儼相峙清坐一晤嘯天風振空聲萬境通寂照

辛夸塢

迎春發蒼柯映日在瓊萼欣欣各自私先開還早落

漆園

黽勉殉世名鞅掌嬰俗務漆以津自枯不如樗櫟樹

椒園

申椒芳聲遠東德類幽人時來薦瑤席慎勿佞夫君

天台楊敬惠

藍田可勝宋家莊認作伊家華子岡身後不知誰是主  
謾留副墨至今香 食淡衣麤識幻身如何幻境却留

神早知大地非真有已了前生不二因 吳徵

開元宇宙承平日華子岡頭曾燕適至今自貌輞川圖  
下有幽人交莫逆辛夷塢外莫汧隔亦復扁舟春蕩潏  
竹君冰霰歲寒傲未便申椒能辨屈平生雅志厭朝市  
醒醉悠哉倦泉石是間山水無限趣况乃佳賓得裴迪  
規模想像郭忠恕垂四百年留妙迹鶯啼花落香句在  
誰信長安歎疑碧後來拊卷意迷茫且復追維三太息  
海南金元帥出此圖與余三十年前張子有家觀摩

詰真卷無不似者則忠恕殆神仙者流信名下之士不  
虛也 海粟子振

猪龍兒嬉錦綸好三郎歲晚歡娛老阿環姊姊擁華清  
朝士宮前誰敢到右丞脫却尚書履布襪青鞵弄烟水  
藍田別業堪畫圖矮本丹青自遊戲華子岡輞口莊烟  
亭竹館遙相望小橋摺轉青紅牕樹窠歷歷烟蒼蒼樂  
家瀨前兩舟工柳浪一尺春風狂詩成與和者誰子我  
外裴迪誰能雙邱壑風流妙如此安知畫外淒涼意凝

碧池頭天樂聲白髮纍纍淚如雨亂後歸來舊第中元  
牆綠戶老秋風人生過眼皆夢境乞與山僧開梵宮半  
幅吳綃如傳舍俟誰得此千金價客來寒具莫匆匆四  
百年前御厨畫按維本傳輞川乃宋之間別墅在藍  
田後表上為清源寺臨江李核意山

曹霸玉花驄圖

元韋小行草杜贈  
曹將軍丹青引

元祐戊辰獲觀于才翁之子及之對紫金浮玉書米  
敬廣平程鉅夫觀

高秋風起玉關西  
踣鐵歸來十萬蹄  
貌得當時第一匹  
昭陵風雨夜聞嘶  
雍虞集題

韓馬圖

三大字為  
止庵書

吾自小年便愛畫馬  
爾來得此見韓幹真跡  
乃始得其

意云 子昂題

山陰王  
惲家藏

唐人畫馬如相馬  
不在驪與黃  
天機入神即揮洒氣脫  
毫素先騰驤  
昔年曾畫穆王游八極  
八龍之馭雲五色  
後來又寫越影超光晚  
丹碧後來又寫漢武窮渥洼復



見神駒來漢家勢走滅沒開風沙壯哉此馬健且雄玉  
花遍身雲滿髯首如渴鳥眼如電皎如足練橫晴空使  
之陷陣當破敵萬馬不敢先秋風如何解鞍脫其局縱  
爾倣儻如游龍若不見四海罷征戰九夷盡梯航方將  
却爾宛水之西歸爾華山之陽幸逢韓供奉寫爾神杜  
拾遺歌爾良贈爾支道林愛爾神駿懸高堂 陸游題

龍媒神飛影在紙雙瞳黑濕電光紫烏首昂昂渴奔水  
青髯迎風拂不起逸氣難居阜樞底勢欲陪龍走千里

月支真馬有如此落筆一與王生似云是吾州韓畫士  
長安趙說題

韓公畫馬稱神筆矯首昂藏山鬼泣眼明見此飲馬圖  
乃知矩度不可軼定嫌昔日徐庾體渴驥奔泉超法律  
騏驎驂騑老千里屹立天閑甘伏櫪氣勢相宜適搃縱  
肉骨兼勻稱肥瘠世人但以驪黃求翠駁玉花煩剪剔  
若論右軍愛鵝趣知公愛馬應成癖山陰道士不  
換經已悟黃庭養生術特將此卷叅馬祖待須一口西

江吸 江陵吳靚題

左輔周垣隱白沙龍媒絕種進天家  
驕嘶玉勒憐豐草  
渴飲冰泉帶落花  
西狩還經千里棧  
東巡曾駕五雲車  
權奇滅沒猶驚電  
漫許拳毛世特誇  
岑津

圉人唐衣冠  
天閑畜神駿  
雖非金日磾  
不忝張景順  
飽食無嫌身賤卑  
時其渴燥張飲之  
長年牧養瘠者肥  
龍鬣鳳臆誇權奇  
韓幹仙翁揮翰手  
毫端幻出渴烏首  
氣不凋喪骨肉勻  
藝精端繼王裴後  
遙想騰驤析木津  
御

勒難拘自在身斗水底用求他人淥波汙汙易水春

吳興許采

一青居士

奚官小臣職奚為馬飢則秣渴飲之龍媒八尺千里姿  
雪花被身雲陸離渥洼異種來天池乘興重惜閑驅馳  
河青海晏無盤嬉壯士老死不得騎御柳春深白日遲  
寒楚淨汲冰花漪目光注電吻沫脂振迅欲掣青絡絲  
奚官小臣謹厥司猶恐若後呵譴施不必前身作馬通  
馬語人心物性在善推嗚呼奚官小臣身卑賤馬不如

人愚亦知奈何為人牧重爵厚祿不卹民渴飢浚刮膏  
血剔肉肌坐令溝壑轉老羸今之龔黃卓魯誰雲林叢  
社時所師爲出馬圖陳馬詩 淮陰龔復題

韓公曾次有神奇寫得天閑八尺駒曾爲岐王天上賜  
不隨都護雪中驅霜蹄奮迅追飛電鳳首昂藏似渴烏  
春草青青華山曲三邊今日已無虞 吳興錢舜舉

何年供奉仙寫此真乘黃矯矯天骨起爛爛隅目光豈  
無萬里姿御者非王良青衫老奚官肉眼空俵俵飲秣

不以時羈馬無繇驤昂首思渥洼浩蕩充虛傷何來斗  
斛水似是出尚方雖露金井思未效和鸞鐙蹉蹉十二  
閑何異古道傍回首萬鴛鴦飽食馳康莊朝飲華清流  
暮垂紫遊疆此馬獨棄捐物理良可傷君王倘惠養請  
試首嘗長 石林道人呂量

渴烏頂領紫駝峯跑地求泉麓上銜不敢牽來向江水  
預防踴躍學蛟龍 天台高翔

圉人扈從溫泉宮曉汲清波浮落紅驂駟解語意相得

肉駿振動嘶春風天子臨軒催羯鼓繡茵檀板登床舞  
美人眄睐相輝光那復臨邊思報主潼關夜半烽火明  
錦綳兒來坐大庭此馬棄捐何足道顧影長城厭水  
腥 丹丘柯九思賦

天廐馬神龍姿目如明星耳如錐拳花鬣毛雲陸離揚  
鬐掉尾頰虹飛天廐馬閑且驕繫以青絲勒以鑣渴不  
得飲瑤池泉飢不得食瓊田苗豆粟不滿腸胃枵口不  
能語足屢躑天廐馬壯且武食主之食須報主莖秣失

時罪在牧圉無如宋莊不得咀嚼棄其國人仇敵是與  
天廐馬爾不聞趙時廉將軍一飯斗米肉十斤被甲踞  
鞍走若雲破斬栗腹殺劇辛北推燕胡西却秦至今萬  
古稱良臣又不聞漢季劉荆州有牛千斤角曲觥啖食  
十倍于常牛負重不若一牝老瞞渡江俘楚囚骨肉  
解割庖刃游天廐馬飽爾食草間豺狼追誅強威孤撥  
刺矢未直嗟爾神駿須盡力他年定遇田子方櫪上優  
游感恩德 括蒼劉基



龍性難馴萬里姿駸駸只欲望風馳奚官母惜斗升水  
要載君王問具茨 吳郡姚道昌

五花雲散紫電光絳維未許飛龍驤垂頭欲就圉人飲  
渴烏作勢吞銀潢長安畫史擅筆力萬里猛氣收毫芒  
羽人乘風倦鞍勒一笑收拾藏巾箱世人不識真驕驄  
顧影尚爾分驪黃放鶴峯前有遺意神駿政可誇支郎

韓性

將軍西征過崑崙戰馬渴死心如焚榮勲脫鞍瀉汗血

一飲瑤池三尺雪身如飛龍首渴烏白光照夜瞳流月  
長城凍合霜草乾駿骨削立天風寒木牛沈絕糧道阻  
中軍餓守函谷關太平此馬惜遺棄往往駕駘歸天關  
區區芻粟豈足養忠節所盡人尤難摩挲畫圖不忍看  
萬古志士空長歎 雷門唐珙

當時四十萬尺中出羣意氣偏豪雄三駿剪花蹄削玉  
拳毛一團如旋風飛騰射獵南山下踏雪歸來汗猶赭  
奚官乍卸紫馱羈解渴汲與華清泉鳳頭青絲掣欲斷

一口擬吸天池乾日奔千里如電走飲秣翻落駑駘前  
東家蹇驢鈍莫驅熱浴冷水飢齧芻賢愚否泰亦如此  
撫膺歎息良馬圖 會稽鄭嘉

韓公畫馬得馬趣落筆宛有盧遵風腴肥不見筋骨露  
騰驤始知氣力雄朝逢圉人汲秋水精神炯炯雙方瞳  
卷中題詩十五客唯有括蒼留古色卷舒雪涕憶前修  
太息後來那可識越城戰鬪白日昏故物紛披橫道側  
子雲持來慰愁寂如造長安供奉堂前年沙漠射黃羊

我馬飛行蹴雪霜  
誰挽天河洗兵甲  
但騎款段還家鄉  
臨川危素題

宛國來廷日  
滎河貢篚年  
赤墀騰紫電  
金埒護非烟  
表自殊方進  
思從上國宣  
雄姿王緒識  
神駿九臯憐  
蜀錦新裁  
鑿秋金旋鑄  
鞭步因先八駿羣  
許壓三千試處岐  
王躍看時太僕牽  
清泉來碧甃  
瑤草獻瓊田  
弄影春風裏  
驕嘶御柳邊  
聽歌長踊躍  
教舞每踟躕  
羯鼓聲逾壯  
鑾輿勢欲遷  
腥風搖太液  
烽火逼溫泉  
幸蜀謀非晚  
殲

胡計失先潼關寧赴敵渭水宵遊畋殺氣橫西苑房星  
隱舊纒長安悲汗血仍為寫真傳 瞿祐

漢家天馬來西域項若啼鷄身八尺秋風嘶雨入昭陵  
舊苑空餘烟草碧當年逐虜向沙場千里萬里行冰霜  
百戰歸來汗溝血斗水安足充枯腸食君之祿為君使  
背義偷生真可恥臨川老客獨傷心把卷看詩泪如水

周景昇

掉尾玉驄金絡頭驕嘶騰踏吸寒流莫教重過長城窟

水月光中漾羈縻 張士奇

雲間陵嘉同松陵張元道馬成龍觀于東郭草堂

右唐韓幹用黃麻紙畫飲馬圖真跡畫馬開元中獨稱  
江都王緒曹髦之父子得骨肉勻停法於戲筆處稱裴  
絳州天寶間雖陳閣名擅一時而韓幹不肯師謂其徒  
摹寫形似唯曹家沈著神采生動有自然風格所謂奇  
也惟元朝趙松雪深得韓曹之法今觀此圖風致縱橫  
隨意所如稱為神手且題識盈卷極諸名家鉅儒珠玉

錦繡雲蒸霧翳誠為希世寶也 永樂丁酉仲秋月朔

廬陵周岐鳳題

吳興陸遂觀于四宜樓

唐周昉士女圖

泥金字標題款  
云臣周昉進

卷為宋秘府所藏前立一女官紫袍束帶翠靴尖利如  
騾弓兩手橫扇柄扇坐者應是妃嬪行戴碧玉蓮冠蟬  
紗映皙肌儼海棠初放按紈若有所思一侍女側髻若  
羊角手捧藻瓶素裳赤繻綠寫作岐頭樣一侍女圓髻

若盂鉢花衫綠裙紫舄如前女式持帨于左一侍女拖髻  
若懸壺白襖紫褲紅舄亦如前女式抱琴俟抽抽者為  
垂鬟女子淡紅袍硃束粉紅幫更纖躋也其抽琴囊甚  
力一姬以手擁髻體殊嫵冊衣錦却立一裏唐巾後垂  
二帶紅袍繁程上下花補子握鏡向姬一姬髻頂覆如  
意插半月小梳凡三持小團扇倚繡床支頤生倦態一  
姬髻分心披後如幅巾著花半臂拈針引線向繡棚一  
作墮馬髻紫花脫圍腰對前姬刺繡一堆髻向頰儼然



妃粧綠衣紅襠背坐揮小紈一高髻大于面文綺殷攔  
著綠絲襦和身靠桐樹十三人惟二女官及兩小鬟身  
小餘俱肥大腰腹無異懷娠而肩則坦削具穠麗狀如  
畫史所載吾禾項子京即以所載跋後焉又項氏有號  
國夫人行遊圖為周昉筆素地盡已爛去惟人馬獨存  
僅八騎也容體較前圖殊清俊珂玉識

景元春院鬪鷄圖

昔郭汾陽之女謂周昉貌趙并得其神情今觀此春院

鬪鷄圖閨人具穠麗豐肥之態稚子得嬉笑褊負之狀  
介羽膈膊竦身悍目昂尾矯興躑躅高舉正在阿堵中  
也更竹樹花石種種咸臻六法應出仲朗手然與時維  
流火之初南枝倍蕾作一二花 紀水方流玉水子記  
于凝霞墨花二閣書畫筭

唐人香山圖卷

七人五百八十四拖紫紆朱垂白顙囊裏無金莫笑歎  
尊中有酒且歡娛吟成六韻神還旺飲到三盃氣尚粗

菟我狂歌教婢拍婆娑醉舞遣孫扶天年高過二疏傳  
人數多于四皓圖除却三山五天竺人間此會且應無

俞和

碧樹丹厓處處春幅巾藜杖總閒身乾坤納納如許大  
一代風流只九人方和謝雍

韓晉公五牛圖

明顧氏  
芸閣藏

公諱滉字太冲休之子史稱其在德宗朝駿駉無言深  
得相體矧出將又得統鎮之制此全人矣書法張顛畫

師陸探微嘗自言不能定筆不可論書畫豈尋常筆墨所能彷彿哉牛圖黃麻紙上徽廟金書標題辛未歲予得是卷適項孔彰來見之即取案頭宣德紙影去自此臨本不少其趙松雪三跋孔克表一跋為竹懶翁刻六硯三筆而卷已旋售真如烟雲之過眼然余所存戴嵩牛牛圖中有牧童影猶足侈夜郎王也 珂玉識

關仝春山谿閣幅

山色濃綠如潑樹屋以墨染之有筆愈簡而氣愈壯景

愈少而意愈長畫史稱其師荆浩晚年有出藍之美余  
後得洪谷子雲壑圖真有筆有墨者畫家競多荆關余  
何幸獲此雙璧平陽王子記于墨花閣

貫休應真高僧像卷

不由文字見真機直指人心意亦微多少老人迷未悟  
西來何事又西歸 達磨

擇火拈香還作麼道場元在一身中人間萬事休過分  
步步相隨是此公 誌公

化成殿裏赴齋時自是神交匪夙期無量劫來揚化了  
南歸一笑已先知 竺法華

布囊破席任吾真卧雪當街待箇人爭奈時人多不識  
百千彌勒此身分 長汀老子

飯床踢倒儘由渠佛法何分細與麤臨濟將來本直綴  
全身脫去也如無 普化禪師

東家人死西家哀世上何人識破來只為豐干太饒舌  
至今巖罅不曾開 寒山拾得

拄杖請師權放却外通消息不須猜善知識破長沙悟  
三聖將何祇對來 善導和尚

翻身跳入毒龍湫嚇得慈明半死休直待他年六月下  
西歸一笑不回頭 泉太道

杖藜至處自悠然手托猪頭不是顛成佛善還因喫菜  
世間驢馬也升天 金華聖者

鰕蜆充飢困即眠長披一衲過炎天人問西來祖師意  
酒臺盤在廟神前 鰕子和尚

歲癸卯長至後八日山陰王英孫贊

此卷相傳為十六羅漢及觀題偈皆初祖以後應真高僧作者豈深于禪宗不屑果位者耶畫法亦非伯時以後有也貫休之徒方能為之 董其昌題

面目手腕描法如春蠶吐絲衣褶用玉筋篆也王子才亦參禪有得者又跋梵隆十散聖衣紋用水荇描法氣韻古澹余最喜其頌金華聖者云 李日華

此卷余得之梁溪華氏丁巳花朝董太史玄宰過余墨



花閣題之後君實翁兩跋焉因考英孫字子才號作竹  
宋季人所藏有雪竇和尚卷云有無盡是兩頭語諸祖  
因不立言詮末代兒孫立戶牖一花五葉失真傳又永  
嘉雖問曹溪路畢竟惟聞自己禪根器警拔誠難遇鑿  
透高原始及泉觀此則應真諸贊深有得乎雪竇者矣  
余更有對月了殘經為姜氏德隱真筆其古朴遜前卷  
然不類世間所傳也 研玉識

唐張戡獵騎圖

張戡居近燕山得胡人形骨之妙畫戎衣鞍轡之精故  
入神品此卷非戡不能到余甚愛之宜什襲珍藏 吳  
興錢選舜舉

一犬前移五馬隨  
赭袍公子跨烏騅  
壯遊却憶飛狐北  
正是清秋出獵時  
文水高若鳳

戎王小隊獵秋野  
豹尾弣弓金絡馬  
蒼髯奚官喜追逐  
隔馬相呼意閒暇  
鞭梢生風箭飛雨  
烏騅如龍犬如虎  
沙平草淺狐兔肥  
穹廬月寒歸未歸  
晉安林泉生

張戡者朔方人也當五季之世與胡瓌父子李贊華房  
從真俱以善畫番部人之屬名于時其畫以狼尾製筆  
蓋必有所取焉今觀戡所畫獵騎圖一卷其間人物犬  
馬弓矢服飾之類毫分縷析曲盡其妙觀其攬轡疾馳  
宛然有沙漠萬里之態于是知戡畫法精絕與胡李輩  
不相上下也 吳郡沈石識

張戡妙筆最能寫寫出胡沙好人馬赭衣壯士挾弓矢  
清秋出獵山之下山林霜後百草枯走犬前驅愁兔狐

斯人往矣不可見撫時懷古披斯圖 王庭松謹題

燕角斜弢虎韞中將軍騎氣正驍雄前鋒縱有韓盧技

指示猶居第一功 東南生謹題

唐人作毛女圖

著色絹上  
詩題斗方

結草為衣類鶴翎初來一味服黃精宮鶯幾處銜花出  
猶向山中認得聲 粵人謝翺

秦宮一別竟忘還飲露飡風駐玉顏却笑祖龍仙分薄

蓬萊空望海邊山 清江教英

寶瑟無絃尚自隨秦聲那復記當時山頭剝棗分猿喫  
雲裏巢笙喚鶴騎見說劉郎驅阮籍空勞徐市覓安期  
華陰萬樹長松葉却笑君王未得知 祝允明

白雲堆毛女一雙丰姿端麗錯著綵繒樹皮背絆筠  
藍挿花枝紛披如幕咸握一偃月鈎其亭亭玉立者  
豐趺著草堯其皎皎傲雪者繫襪至脰穿芒屨殊偏  
絹素細裂古色黯然殆唐人筆也或問何以無彼時  
題者余舉唐詩曰曾折梭枝為寶櫺又編櫺葉作羅

襦有時問著秦宮事笑然仙花問太虛是即為嵩華  
女寫照焉然有獨處者如玉姜輩蘇文忠公云霧鬢雲  
鬟不著衣山川良是昔人非祇應聞過商顏老獨自  
吹簫月下歸乃斯並肩者其魚氏道超道遠為秦時  
女真人歟楊鐵崖所咏華陰毛女藏雙魚殫松啖栢  
留春容若為此圖設矣 繡里脈望生識

梁趙巖神駿圖卷

南山之下汧渭之間想見開元天寶年八坊分屯隘秦

川四十萬匹如雲烟騅駟駟驪駟驪白魚赤兔驊皇  
駟龍顧鳳頸獐且妍竒姿逸態隱鶯頑碧眼奚兒手足  
鮮歲時剪刷供帝閑柘袍臨池侍三千紅粧照日光流  
淵樓下玉螭吐清寒往來蹙踏生飛湍衆工舐筆和朱  
鉛先生曹霸弟子韓殷馬多肉尻睢圓肉中畫骨誇猶  
難金羈玉勒繡羅鞍鞭箠刻烙傷天全不如此圖近自  
然平沙細艸荒芊綿驚鴻脫兔爭後先王良挾策飛上  
天何必俯首服短轅 趙巖所畫此圖深得曹韓筆法

余亦好畫何能及也故以杜子美詩書之大德五年  
節子昂

右調馬圖乃後梁駙馬都尉趙巖筆也巖喜丹青工于  
人馬而胸次不凡能脫去筆墨畛域故其所作與尋常  
畫手不同圖後松雪所題筆法精謹異于他書豈亦重  
其畫而然耶此圖舊藏余友何翰林元朗處今始見之  
因題其後時萬歷丁丑三月廿日茂苑文嘉

趙巖畫人馬余不多見僅見此卷其筆法高古猶有曹



韓遺意蓋梁人去唐猶未遠耳趙魏公得畫馬三昧者  
故深加賞歎錄杜拾遺長歌于其後微此歌此書不稱  
此畫矣然拾遺集無此作魏公何從得之古今詞人之  
作散逸不傳者多寧獨此歌而已余按圖索駿乃并得  
詩恐天殿真龍不傳老杜雕龍也 壬戌中秋後五日  
太原王穉登題

蜀黃荃芙蓉

宋思陵題

照水枝枝蜀錦囊年年澤國為誰芳朱顏自得西風意

不管千林一夜霜

黃要叔富貴圖

牡丹為富貴花王繪之者往往落俗古惟蜀待詔黃筌  
能工此種是畫設色布置神氣迴別至縑素碎脫而花  
瓣枝葉無少損定出要叔筆也售之者云有四幅今只  
得其二彼無限春風阿誰帶笑看也又題云疎簾古畫  
展春光葉葉枝枝富貴香自覺嬾晴天氣勝千年尚襲

錦江黃 駕水汪硯識

李昇林泉高隱圖

昇五代蜀人世  
亦呼小李將軍

自古雲林多隱者扶筇垂釣思悠然不妨濯足溪流畔  
畫裏相看認古賢 子昂

為厭繁華愛好山幽棲贏得此身閑生平已足林泉興  
留取高名滿世間 京口郭天錫

有客垂釣還展卷何人策杖且觀雲掀髯濯足應高士  
一種風標似不羣 虞集伯生

山青雲白萬林秋中有隱者心天遊行來濯足天地闊

不與世輩同朋儔 吳郡王希白

周文矩唐宮春晚圖

周文矩宮中圖婦人小兒其數八十一男子寫神而裝具樂器盆盂扇倚席鸚鵡犬蝶不與文矩句容人為江南翰林待詔作士女近周昉而加纖麗嘗為後主畫南莊圖號一時絕筆他日上之朝廷詔籍之閼闔宮中圖云是真蹟藏前太府卿朱載家或摹以見餽婦人高髻自唐以來如此此卷豐肌長襦裙周昉法也余在嶠南

于端溪陳高之裔見其世藏諸帝像左右宮人梳髻與  
此畧同而了鬟乃作兩大鬟垂肩項間雖醜而有真態  
李氏自謂南唐故衣冠多用唐制然風流實承六朝之  
餘畫家者言辨古畫當先問衣冠車馬蓋謂是也 紹  
興庚申五月乙酉澹叟居士張澂題

董北苑溪山風雨圖

右溪山風雨圖一卷無題識有私印曰容齋清玩官印  
曰紹興省試總轄諸司印按宋洪邁號容齋在理宗初

以奎章閣學士知紹興府此卷有紹興人王某題稱知  
府相公所藏意者為洪氏物又有皇姊圖書印馮子振  
詩奉大長公主命題子振吾長沙人號海粟又號怪怪  
道人今私印用篆者仕元為集賢待制所稱皇姊為元  
公主則此卷又為元外戚家物又有李氏珍藏印不審  
為何人今為庶子吳君元博所藏也嘗記容齋隨筆稱  
畫之妙者人必以為似真江山之妙者則又以為似畫  
此世間常語今觀此圖凡谿山草木人物器具皆風雨

也論畫者殆將以為真乎使其固幻然歷二代數百年  
宋元之江山皆不能有而此圖方入盛世為大夫君子  
所藏玩觀物者不以真幻為輕重可也 長沙李東陽

竹懶云洪谷子故有溪山風雨圖余嘗見王叔明所臨  
卷較此尚長二尺餘而景物更有歸僧扣寺門牧兒逐  
墮笠與浮鼻之牛守門之犬而此俱無之則西涯所云  
斷爛收拾不獨楮素脫落印章不全而已然其筆氣渾  
厚人物精采所作客舟倚樹搭蓋蓬席一婦一童子目

晴仰注如生山樵有不能不遜步者專車一節想見偉人不可忽也

此卷向藏余家今歸李氏清樾堂矣

郭恕先升龍圖

建武神仙事渺茫西桃王母惜劉郎赤龍一去無消息  
兒子東方御榻傍萬戶千門築漢宮魏我井幹與天  
通青禽當日銜書降從此瑤池碧樹紅馮子振奉皇  
姊大長公主命題

海上參差十二樓閨風玄圃綵雲浮神仙尚厭人間世



故作乘龍汗漫遊  
建章宮闕漏沈沈  
翠輦春游接上

林未識嫦娥天上樂  
廣寒丹樹五雲深  
鄧文原

雲旗來下覲仙姿  
漠殿陰陰碧瀨池  
眼見赤龍騰踏去

穆王八駿不能追  
趙巖

曹瞻

宋復古輩洛小景

思陵籤  
題已泯

宋復古用墨得摩詰之秘  
此卷曾入宋內府印款俱有

左驗彥廉寶藏之

齊郡張紳題

士行  
白文

宋迪字復古洛陽人由進士為郎善山水松石此卷林

逕深窈烟嵐開合蓋即鞏洛之景而模寫也曾入紹興  
內府故思陵題識尚存世傳宣和所藏未免白玉微瑕  
非若紹興皆極精選復有劉宸妃奉華寶藏之印又神  
品上上今圖後有奉華瑤暉堂印信為真玩也彥廉其  
保諸 汝陽袁華書于陳氏春草軒

雲烟澹容與岡嶺岌奔騰脩塗遶巴蛇歸人如凍蠅宋侯  
天機深游戲精藝能風流各異代卧遊聊曲肱 倪瓚

落日下嵐嶺行人逢已稀隔烟望田舍慙未掩荆扉鳥

亂夕林暗草多秋  
逕微家人知候我  
賣畚郭中歸  
勃  
海高啟

一望秋嵐似春路  
迷入谷無因斜陽  
欲雨未雨別嶺歸  
人幾人鐘斷鳥沈  
僧塢吹殘鷄唱樵  
鄰峯迴忽見月出  
稚子相迎礪濱  
蜀郡王彝

深谷含夕暉幽居  
入林迴澗底采芝  
還臨流見筇影松  
鶴已先歸蘿扉掩  
微暝  
張適

青山鞏洛舊林園  
髣髴昇平古意存  
雨外人歸秋葉浦

烟中鳥下夕陽村昔年題字宸光合今日披圖野興繁  
風景西湖仍不異惟餘故老說中原 吳郡謝徽

山村晚色秋離離蕭條郭西初出時烟嵐莽蒼家住遠  
道路詰曲人歸遲重擔緣峻氣促息薄袂迎風寒倒吹  
隣樵偶值得相問到門此夜如何其 蘇人王行

曾入思陵內府藏瑤琨綢軸舊裝潢山頭怪石如蹲虎  
谿上行人似散羊鶴谷逶迤迷短渚鯨波起伏見層岡  
至今玉璽分明在猶帶宣和雨露香 東海釣鼇客

陶振

復古運意高妙筆墨清潤大抵多師法李成議者謂山之體貌古今第一則復古之高妙自有來矣袁子榮先生精于鑒畫以有奉華堂印知為思陵所藏時劉夫人侍高宗掌內翰文字居奉華堂故以其印識之後為陳氏彥廉所得自季迪諸公題識以來又幾十年矣先觀復古之畫復觀諸公之作恍然寘我于林壑窈冥間與行旅相逐歸途也品在神妙不亦宜乎致翰林國史脩

撰事承務郎東吳張洪識

北宋董北苑秋山行旅圖

董其昌  
觀因定

北苑畫米南宮時正見五本予家所藏凡七本以為觀  
止矣都門又見夏口待渡卷吳閶泊舟又見此本皆世之  
罕物 其昌重題

珊瑚網卷二十五

欽定四庫全書

珊瑚網卷二十六

明 汪砢玉 撰

名畫題跋二

李成山水寒林

山水寒林李營丘神境也其位置礧礧自得其氣韻飄渺欲仙其骨力矯矯如遊龍其彩神霏霏若翥鳳迹簡而意淡登顧陸之堂細密而精微入展鄭之室風日晴

美時清心展閱恍置身在寒泉古木間耳 世賢子

萬歷癸卯秋歛客質繪冊于先子高君明水來見遽持  
去後再期明水以逾期不聽贖已濡墨點綴竹樹客訴  
非己物將奈之何惟所攜李咸熙畫一軸原值二百五  
十近付善手湯氏裝潢甫完無已將此畫曲償之耳淚  
潛潛下也先子惻然稱貸多金存其畫客一去杳然未  
幾董太史玄宰過舍極鑒賞是幅正欲跋其上會兵憲  
邀宴連速不果先君遂自題數語至崇禎己卯夏竟被



姑溪友人賺去余不憚千里追返內人嘆曰世已為無  
李論君何必作有李論而後役如此余笑曰不知其人  
視其畫誠如東坡所云縹渺營丘水墨仙乎因述當年  
典畫事爾爾 龍惕子汪砢玉識

名畫李成以山水供奉禁中然以子姓饒資為宮市珠  
玉大商不易為人落筆惟性嗜香藥名酒人亦不知獨  
相國寺東宋藥家最與相善每往醉必累日不特紙素  
揮灑盈滿箱篋即鋪門兩壁亦為淋漓潑染識者謂壁

畫最入神妙惜在白堊上耳此宋時百歲表老楓窻小牘所載綴之用補畫史砢玉再識

李營丘暮林疊岫圖

桑苧未成鴻漸隱丹青聊作虎頭癡久知圖畫非兒戲到處雲山是我師

澤民朱潤

元人

范寬長江萬里卷

范性落拓迂逸人因以寬目之後遂用題識其名故中立也

昔在苑西有吳太學持范中立長江圖見示位置正如此卷猶心疑為裴旻之虎今見真本快心洞目之觀始

信鑒裁不謬 史官董其昌

余有范華原雪景山樹依稀世號范臘梨云樂鄉

僧巨然山寺圖

即治平寺圖其元人題跋已刻六硯三筆

此卷在梁谿華氏家余求之數載不得一觀今為公甫  
所有得展玩竟日其墨法筆法似右丞范寬與巨然平  
日淡墨輕烟少異蓋唐宋人畫派如出一家不可以格  
數輒較量也卷末諸名手論之脩矣余何容贊 甲辰  
六月三日過南湖觀因題董其昌

吾鄉吳太學功甫謝世後諸珍秘散出時先君得是圖  
又唐鵲靈壁石名列翠者及他書畫玩好無何為鬻古  
輩先後賄去復得無款山水一軸竹懶翁見而題之曰  
骨格沉古秀鬱芊綿的是北宋董巨之筆或云夏禹玉  
已屬貌相矧更引而下乎具眼者自得之懶翁時過笑  
賞謂即巨然山寺圖矣 汪砢玉識

崔白林塘刷羽圖

在絹幅上着色樹石芙蓉水邊  
立一鶖軒翅翹頸儼然生動

雨後菰蒲翠色分水邊野雁已離羣杜陵對酒吟詩愛

更憶山陰王右軍 靜學題

崔子西桃澗雜黃真蹟

善聲而不知轉未可謂善歌也善繪而不善染未可謂  
善畫也是作桃紅覆澗水犀雛啄宿其間笋芽迸出樹  
根游蜂撲花不定神彩煥發氣韻生動最得傳染之妙  
固趙昌流輩歟昌之每當晨露遶欄諦玩掌中調色  
工素自號寫生驗之以手捫摸不為采色所隱若蘭亭  
所蓄又非濠梁崔藝學莫工此也總之如善歌者得其

轉法矣謂昌之可謂子西亦可矣 珂玉題

紡車圖

卷首周天球大書  
故宋王居正筆

王居正拙之手也俗以其小字呼為憨哥學丹青有父  
風師周昉士女略得其妙嘗于苑園寺觀衆遊之處必  
據高隙以觀士女格態凡欲命筆則澄秘思慮故于形  
似為得

右聖朝名畫評按王拙河東人也大中祥符間父子  
以畫馳名海內延祐四年七月予客燕都有持此圖

相示者因以五十金購之乃賈師相故物也圖雖尺  
許而氣韻雄壯格意高古精采飛動真可謂神品者  
矣是歲中秋日松雪道人趙孟頫識

春風楊柳色麗日何清明田家作苦餘軋軋綠車鳴  
母子勤紡績不羨羅綺榮童稚嬉自樂小厖恬不驚  
緬思前盛日萬物遂所生王郎稱好畫奕世垂佳名  
詎意劫火餘留此天機精千金匪重價至寶那可輕  
暇時一披閱邈焉起遙情 後二年四月三日重題

子昂

高克明雪意卷

前有高克明三字後有開州年氏書齋清玩八字乃宋人書

畫譜稱高克明得李成筆意蒼古清潤為北宋丹青名家思陵嘗有詩評云克明已往道寧逝郭熙遂得新成名則其品第皆出熙上也而其真迹世不多見此雪意卷廷美僉憲得之于道遜太僕圖不盈丈而三遠備焉誠不意得者余題之為劉氏山房所藏第一云題竟廷美復強余詩余適遊雪湖得一律猶能記之因書以塞白



湖山勝趣自難窮雪後登臨興倍濃大地盡成銀色界  
一塵不到水晶宮舟移月洞雲庭外人在冰壺玉鑑中  
我欲題詩誰屬和惜無魯望與逋翁 成化己丑春仲  
天全翁有貞書于虞山上湖舟中

赤脚真人龍鳳姿俯視藝苑時游嬉良工待詔金門裏  
高生前身應畫師含毫吮墨立良久自言臣是唐王維  
平生胸中無一物獨有山水能容之郭熙成名乃新進  
范寬得意纔並馳丹青競巧稱院體後來不比宣和時

密竹千岡松萬壑蒼翠峰巒白湖灤岼傍桂楫何處移  
碕曲茆堂是誰縛行人暮歸天漠漠遙望前村愁雪落  
船頭一老自閒暇詩意分明入寥廓劉侯朝迴過燕市  
亦復愛畫入骨髓偶從太僕得此圖每一開之心輒喜  
天全仙翁惜題字評品數行非佞史翁今已逝侯亦亡  
兩洞庭荒渺湖水石田多才從後起況有佳兒好文事  
只今寄物欣有託賦詩獨媿前人耳宋社久已屋宋畫  
如有神劉侯地下勿長笑楚子得失皆吾人 延陵吳寬

郭熙春山對酌圖

何處春山聳翠寒  
洒然林下見衣冠  
高情此日難為別  
且盡壺觴物外歡  
雲隱信筆題

二老相忘共一家  
笑談酬酢總堪誇  
獨憐雲白山深處  
極目枝頭不見花  
北山錢復

雲白山青風日柔  
有人同在此林邱  
一樽細酌東風裏  
解折山花當酒籌  
谷西

郭河陽夏山行旅

畫行旅者四時俱供筆端此其炎景山程耶雄偉清潤  
妙絕如許余每懸齋壁森然若在長林豐草中與策蹇  
停驂者相周旋焉熙嘗言畫山水數百里間必有精神  
聚處乃足畫散地不足畫也誠然哉 玉水子

丈與可晚靄橫看卷

壬戌之秋程李白飛霞舫成招李君實及珂雪與余集  
舫中看新得漢玉圖書約三百方因示文同畫卷曰晚  
靄橫看君實題其後用東坡思無邪齋章鈐記余共珂

雪各印諸玉作譜婁東朱錦春撥阮奪落葉響吾輩無  
暇聽也歸而思此圖樹瘦于竹艇小于葉遙山遠水層  
出林端暮烟凝靄掩映亭閣畫中人應爾橫看無盡意  
躍躍焉東坡嘗稱與可下筆萬衆妙而不言其善山水  
乃山谷于吳君惠處見文湖州晚靄橫卷兼有王摩詰  
關仝筆力世僅以洋州竹一派稱之何足以盡石室又  
與可至天彭館徐氏園杯酒談笑中肆筆成焦夫子像  
于亭壁曲盡寒酸態度焦蓋博學導後進貌陋且怪性

率不自飾者元豐壬戌郡守聶子固徙其壁于郡圃凝  
翠亭今有石刻在是與可又善人物也故坡公謂與可  
詩文不能盡溢而為書變而為畫畫皆詩之餘乎詎意  
此卷至崇禎初歸留都一大老後共徽廟竹禽卷殉葬  
斯劫一遭真珠沉滄海矣可勝憾憾 秀水汪疇玉記

後聞不果殉今  
在譚埽卷處

文湖州竹枝卷

若人今已無此竹寧復有那將春蚓筆畫作風中柳君

看斷崖上瘦節蛟蛇走何時此霜竿復入江湖手  
東坡居士題

延祐乙未秋九月十有八日薊邱李衍觀于毗陵趙東  
臯之書隱謹題

翰墨真儒者事畫

字缺一

如山未知判取詩書萬卷來看

風霜一枝

此老墨君三昧雲山發興清奇我在蓬萊書府曾看晚  
靄橫披

余曩客京師獲觀文湖州晚靄橫披圖山谷題識其上真絕品也文湖州平日丹青之妙不止墨竹故因及之

鄧文原

石室先生墨竹之妙與雪堂先生之書同具鍾王妙趣此卷為郭君天錫所藏文畫蘇書紙蠹而墨色如新題識俱有徵得一展玩何其幸哉會稽王良江夏費雄天

台柯九思京兆杜本同觀

本書  
隸古

臨行話與崔公度到了神交蘓子瞻却是主林神不管



黯隨涼月墜虛簷 高郵龔壖為郭天錫題

當今好事家多藏文竹觀者每以東坡題識定真偽此  
卷字畫兩優為真無疑 汾石巖民瞻

至治元年冬十二月七日與仁卿來訪天錫得觀石  
室先生墨君真跡薊丘李士行書

僕平生篤好文筆所至必求披玩所見不啻數百卷真  
者僅十餘耳其真偽可望而知之文蘇同時德業相望  
墨竹之法親授彭城故湖州之作多雪堂所題若必東

坡題識而定真偽則膠柱鼓瑟之論也此卷文畫蘇題  
遂成全美余舊嘗見之每往來胸中未忘今復于益清亭  
中披閱令人不忍釋手故為之識同觀者倪元鎮至正  
二年七月十九日丹丘柯九思書

至正六年十二月廿日觀于益清亭趙雍

清貧太守石室翁渭川千晦藏胸中理閒砥筆槩薄羸  
兔走鶻落無留蹤雨稍晴葉各殊態揮灑位置分纖穠  
鍾峰隱居撥鐙法氣韻生動將無同墨君一派來自東

襪材當萃彭城公平生知己最親厚走筆調笑言春容  
陳州官舍示長舌儵然化去當元豐烏乎一老不復作  
空瞻遺墨翔鸞龍汝陽表華

與可題竹款有錦江道人文同為雪岸先生作

蘇子瞻竹枝自題

雲陽友舊最善墨竹與僕別幾歲月矣余在錢塘邀于  
長青閣小飲作此竹枝奉贈不知雲陽以為何如也  
輕翻雪浪煖低挹露珠圓萬籟夜俱寂清風盈耳邊

郁文澤題

曾遊赤壁誦遺文又向禪房見此君一段湘娥廟前意  
淋漓秋水與秋雲 癸未秋七月日過以中上人方丈  
示坡仙竹枝賦此吳郡張雨

老幹脩然舞新枝丹鳳棲後凋並松栢不受雪霜欺

周貢題

君不見昔日眉山草木枯儒宗疎秀生三蘇坡翁文藝  
更瀟洒興來畫竹世所殊一枝一葉有生意虛簷烏雀

驚相呼鳳睛落落疑戛玉雨潤將將欲流酥相去于今  
二百載宛然遺墨懸座隅况乃忠惠舊藏物珍寶真與  
天壤俱 袁桷題

東坡自題畫松

人間斤斧日創夷果見龍蛇百尺姿不是溪山曾獨往  
何人解作掛猿枝野水參差落漲痕疎林欹倒出霜根  
浩歌一棹歸何處家在江南黃葉村

李龍眠孝經圖

紙本

鳳閣舍人楊公雅言孝經關鍵六藝根本百行在世訓所重謂龍眠山人李公麟曰能圖其事以示人為有補元豐八年六月因撫其一二隨章而圖之

龍眠居士圖孝經雖曰隨章撫其一二然自天子以至于庶人威儀動作之節與夫郊廟之規模閭里之風俗器物之制度畜產之性情亦畧備矣東坡謂其神與萬物交其智與百工通者覽之可想雖然龍眠畫贊者多矣至于書史稱妙絕而見者不多今觀其

筆勢若清廟既陳而君子佩玉趨瞻于其間清和簡肅猶有晉宋間人氣韻當時以書名者未必能如此也吾得此卷不徒愛其畫而尤愛其書特珍藏之每紙壓縫有雙龍團印未有紹興字喬氏私印蓋曾入南宋御府而又為喬仲山所藏云水村居氏陸完 有王芝子慶 王芝私印

龍眠孝經圖嘗載雲烟過眼錄藏西人王芝子慶所余後草窻周先生三百餘年往往獲觀其品題是物何多幸也 子京

李伯時畫吳中三賢像

有鄆王書所咏

已將勲業等浮鷗鳥盡弓藏見遠謀越國江山留不住

五湖風月一扁舟

范蠡

西風淅淅動高梧目送浮雲悟卷舒自是歸心感秋色  
不應高興為鱸魚

張翰

杞菊蕭條遠屋春不教鵝鴨惱比鄰滿身花影猶沈醉  
真是江湖一散人

陸龜蒙

覽夢得所藏吳中三賢因各書絕句

鄆王

押

朱文  
鄆王



之印王印  
藏廟也

李龍眠作漢高等六圖

眉公跋云李龍眠患右手米元章始學畫當時已推重  
如此是不然也龍眠細入元章寫意各不相襲余昔  
有此卷為東倉楊汝邁所惠先君即以贈華亭薛氏後  
轉入王越石手天啟三年冬十一月二十三日同李九  
疑太翁觀于春波舟次 龍惕子汪砢玉

李龍眠華嚴變相圖

龍眠居士畫華嚴變相豈獨筆力超逸然此公性理皆通誠可歎服也 庠謹書

龍眠居士宿慧通親規華嚴法界觀手畫毘盧妙相好靈知所現非幻作諸神勇識以次來衣冠纓絡嚴飾具乃至諸天諸大天福德貴神八部等威慈並承佛恩力各隨因地見形勢我思法雲頂中寶紫金光聚起衆地一毛孔中一切見半月滿月諸寶王香雲鬘雲宮殿雲重重單複牙含搥悲愍衆生故在世今我愚蒙得瞻仰願如童真法王子彈指開門入寶閣普禮普讚

盡未來與佛長住金剛定 邵菴道人虞集生贊

前一題乃後湖居士丹陽蘇養真書惜此圖為舊人摹  
本其鋪叙諸天八部龍神之妙不知真蹟流落何許得  
一瞻禮此生之幸也 墨林

李公麟毘耶問疾圖

維摩大士身不有云何文殊來問疾惟其維摩身不有  
故能一念示于有惟其維摩未嘗病故感文殊來問疾  
不二法門共談演不在語默與非默三萬二千師子床

恒河沙數香積國衆生重說不二門畫出空門貝多葉  
若作畫與非畫見則有默與非默異當知未曾開展時  
維摩文殊嘗說法風花雲葉水重重珞公道人如此說  
至大二年三月廿日枯木巖比丘行魁拜讚

文殊如是設問太煞老婆心維摩如是酬荅面皮厚多  
少點檢將來總未勸絕居士元非病文殊謾詰徵無人  
知此意特地覓圖形 至順壬申吳城此山若舟

一生只解彈人短自病元來不會醫非是曼殊來勘破

從前敗闕少人知 慧雲沙門善慶

靚粧士女何足觀此卷宜尊為畫聖 老學菴居沙門天泉  
濡首舌頭尖似鑽淨名心地曲如鉤二千三百年前事  
今日無言倚石樓 洪武十二年知足山翁清楚

真病何憂不易活原來假病極難醫是真是假無人識惟  
有文殊一箇知 徑山心泰拜書

李龍眠作毘邪問病圖前代諸碩師多著語于左中天民應  
上人得而藏焉 洪武甲子會稽溥洽在吳門雨花堂寫

李伯時維摩說不二法圖余曾見之頃氏二十餘年矣今日重展于蘇門舟次一彈指頃去來今謂是也 丙辰夏日董其昌觀

龍眠臨王摩詰輞川圖

絹素上高  
宗書在前

李龍眠所臨王摩詰輞川圖畫法氣韻咄咄逼真卷首有思陵所題誠可寶也但所藏不謹想失去元祐間諸公跋語深為惜哉 至大三年正月既望趙孟頫敬題

甲寅重九日得此卷于湯玉林云龍惕子記

龍眠山莊圖頴濱先生題

此心初無住每與物皆禪如何一丸墨舒卷作山川

右墨

禪堂

清谿便種稻秋晚連雲熟不待見新春西風薌自足

右雲

薌關

蒼壁立精鐵懸泉瀉天紳山行見已久指與未來人

右陳

彭澆

白龍晝飲潭石壁脩尾掛幽人欲下看雨電晴相射

右玉

龍峽

層崖落飛泉微風動喬木坐遣谷中人家家有琴筑

冷右

谷冷

團團寶華巖重重蔭珍木歸來得商鼎試浴溪邊渌

實右

巖華

倚厓開翠壁臨潭置苔石有所獨無人君心得未得

觀右

巖音

巖花不可扳翔藥久未墮忽下幽人前知子觀空坐

雨右

巖花



溪深龜魚騎石瘦椿楠勁借子木蘭船寬我芒屨病

右鵲

源

山開稍有路水放不成川游人得所息真言才澹然

石發

真塢

山居少華麗牽茆結淨屋此間不受塵幽人亦新沐

石薺

雲塢

未見垂雲泚其如歸興何路窮雙足熱為我洗盤陀

右垂

雲泚

伯時作龍眠山莊圖由建德館至垂雲泝著錄者十六處自西而南凡數里巖崿隱見泉源相屬山行者路窮於此道南溪山清深秀峙可游者有四曰勝金巖寶華岩陳彭漈鵲源以其不可緒見也故特著於後子瞻既為之記又屬轍賦小詩凡十二章以繼摩詰輞川之作云

李公麟字伯時舒城人也舉進士用陸佃薦為刪定官又用御史薦為檢法官公麟博學好古多識奇字紹聖五年朝廷得玉璽下禮官諸儒議言人人殊公麟以為

秦璽用藍田玉今玉色正青其書以龍蛇鳥合為文著  
帝王受命之符真秦李斯所為也議由是定公麟能行  
草書善畫尤工人物比顧陸云元符三年既歸老肆意  
於泉石間作龍眠山莊圖為世所寶藏其為文清婉工  
于詩而一時多稱譽焉

右龍眠山莊圖宋李公麟伯時畫伯時舉進士入官以  
博學好古有盛名其畫蓋取晉唐諸名家所善以為已  
有論者謂鞍馬過韓幹道釋追吳道玄山水似李思訓

人物似韓滉瀟洒如王摩詰在宋當為第一手元符間  
歸老山中作此圖其景由建德館至垂雲泚十有六又  
道南溪得勝景之可賞者有四皆山水清秀竹樹茂美  
喧囂塵俗之所不到東坡先生為之記賴濱又為賦詠  
蓋妙絕一時人所寶愛不啻拱壁夫景以畫而傳畫則  
以人而重東坡先生高風大節百世之望也凡詞翰之  
所貴及者天下其誰不重之然則龍眠山莊豈獨賴畫  
而顯哉先生嘗言君子可以寓意於物而不可以留意

于物寓意于物則物長為吾樂留意於物則物足以為  
吾病伯時之矻矻於此蓋留意之病也先生之文出於  
天縱以狀物適情如風發霆震歛然變化於俄頃之間  
於其所當止而止焉非所謂寓意于物者乎今數百年  
龍眠山川固在也其所經營締構不可得而見也矣所  
可見者文章圖畫而已則文章圖畫固可以為不朽之  
託哉雖然亦有時而弊也特聊以寓意焉耳文選郎中  
龍士郁得此卷以求余言因題其後以歸之 士郁求

題余許之久矣不欲孤其意勉綴數語既授之藁又欲親書及其丰而苦之蓋滿眼黑花不能成字遂閣筆至次日乃畢此亦余留意之病也 景泰四年八月八日抑菴老人王行儉書于吏部之南軒是年七十五矣 泰和王直

李龍眠作楊太真瑤臺醉歸圖

宴罷瑤池跨彩鸞天風吹墮碧雲端侍兒扶起嬌如醉斜  
彈雲鬟上繡鞍 西林

雲鬢翳鬢玉鳳欹攀鞍欲上意遲遲酒痕微澹臉脂色  
疑是瑤臺宴罷時 希古

為厭昭陽晝漏遲閑乘玉勒鞚青絲可憐鞞鼓南來日  
不得從容喚侍兒 蘭谷

方侍天顏醉玉醅腰肢無力下瓊臺臨歸恐有重宣敕  
斜倚金鞍首復回 梅莊

謾控青驄欲上鞍翠翹斜亸髻雲寬半酣嬌態花無此  
贏得三郎著意看 友梅

霓裳舞罷酒微醒一笑春風百媚生  
從使君王看不已都門回首鼓鼙聲  
畏翁周寅

溫泉浴罷宴昭陽扶醉乘驂樂未央  
誰道翠華西幸日海棠紅委馬蹄香  
夢草

唐家宮闕驪山頭瓊臺相映華萼樓  
君王荒淫惟酒色日日放浪花間遊  
楊家姊妹白如玉並肩圍坐芙蓉褥  
一時專寵無與俱買笑豈辭珠百斛  
沈香亭畔奏管絃清聲溜滑疑鈞天  
纏頭一賜輕數萬何惜狼藉遺金鈿



號國夫人偏婀娜傾城顏色欺嬌朶醉歸跨馬困無力  
懜騰欲上香羈坐侍兒羣擁弱難扶執鞭俯首顧女奴  
和裙穿鐙強扳鞵未能緩轡行前途嗚呼後人觀此當  
深念女色於人致昏墊早知蜀道苦淒涼亦擬帳中揮  
利劍 故郭吳琬

宴罷瓊臺日暮還侍兒扶醉上金鞍應緣玉貌花難比  
承得君恩分外寬 手攬雕鞍故上遲鬢雲斜彈翠眉低  
玉驄似識嬌羞態鞍向東風不敢嘶 竹隣

宴罷承恩出九重半酣欲上玉花驄嫣然一笑東風裏  
粉黛三千總失容 友竹

金鞍欲上更遲遲滿銓春風擁侍兒一種餘酣消未得  
漁陽醒眼却多時 疑舫

高人卜宅駕湖畔雅趣平生多清玩龍眠居士傳此圖  
見之不惜千金換初看恍惚楊太真寶冠金鳳蝶鴉雲  
雙成小玉侍嬌醉騎邊執勒高將軍又疑日暮湘江曲  
靈妃倚馬愁紅玉帝子南逃去未歸顰眉望斷蒼梧綠

細觀仙妹多綽約宛然含笑東方朔霓裳舞罷蟬鬢斜  
始知宴下瑤池樂西林學士披卷時雄文健羨仍留詩  
才人畫史不易得留作人間雙絕奇

百花正芳艷遲遲春日長梨園笙歌靡十斛葡萄香美人睡  
初覺起來整新粧醉後嬌無力東風吹海棠侍兒鞦花驄欲  
上猶徜徉龍眠驅造化幻出非常翰苑羣公觀爭攜月  
露章休文後裔賢重之如寶藏使我亦披覽裁詩并發

揚養素

李龍眠醉僧圖

在紙上款云  
李伯時畫

人人送酒不曾沽終日松間挂一壺草聖欲成狂便發

真堪畫作醉僧圖

老泉書懷素詩  
并倣其草法

唐僧懷素以草書名天下唐賢善書者亦推重之素有自  
叙一篇備載諸人之詞素深喜絹書吾家前後所得數軸了無  
紙上一字最先所得乃人之送酒詩也老泉山人學書垂  
四十年每愛此詩時詩寫之不下數十張矣龍眠李伯時  
因是時遂作此畫頗能狀醉僧之態而老泉所書自成一

種風格所謂二妙圖耳 東邨閒居方外棠宇叟書

鑒古齋雅玩

余常見李龍眠山莊圖用墨妍秀設色精工真入摩詰之室若其畫人物佛像如以燈取影逆來順往若游絲迴還無迹雖吳道子顧虎頭不能過於此卷可見此卷因老泉先有醉僧詩伯時乃為補圖正所謂合之雙美也 董其昌觀于惠山舟次

龍眠居士李伯時五馬圖卷

黃太史  
箋題

右一匹元祐元年十二月十六日左驥驥院收于闐國  
進到鳳頭驄八歲五尺四寸

右一匹元祐元年四月初三日左驥驥院收董璪進到  
錦膊驄八歲四尺六寸

右一匹元祐二年十二月廿三日於天驕監揀中秦馬  
好頭赤九歲四尺六寸

元祐三年閏月十九日溫溪心進照夜白

右一匹青花驄

原無箋恐即  
是滿川花也

余常評伯時人物似南朝諸謝中有邊幅者然朝中士大夫多嘆息伯時久當在臺閣僅為喜畫所累余告之曰伯時丘壑中人斃熱之聲名倘來之軒冕此公殊不汲汲也此馬駟駿似吾友張文潛筆力瞿曇所謂識鞭影者也 黃魯直書

余元祐庚午歲以方開科應詔來京師見魯直九大於醴池寺魯直方為張仲模箋題李伯時畫天馬圖魯直謂余曰異哉伯時貌天廐滿川花放筆而馬殂矣蓋神

駿精魄皆為伯時筆端取之而去寔古今異事當作數語記之後十四年當崇寧癸未余以黨人貶零陵魯直亦除籍徙宜州過余瀟湘江上因與徐靖國朱彥明道伯時畫殺滿川花事云此公卷所親見余曰九大常踐前言記之魯直笑云只少此一件罪過後二年魯直死貶所又廿七年余將漕二浙當紹興辛亥至嘉禾與梁仲謨吳德素張元覽汎舟訪劉延仲於真如寺延仲遽出是圖開卷錯愕宛然疇昔拊事念往逾四十年憂患



餘生歸然獨在彷徨弔影殆若異身也因詳叙本末不  
特使來者知伯時一段異事亦魯直遺意且以玉軸遺  
延仲俾重加裝飾云 空青曾紆公卷書

此卷已載雲烟過眼錄三百年來余生多幸得獲觀  
馬畫於澄心堂紙上筆法簡古步驟曹韓曾入思陵  
內帑璽識精明直神品也近日摹數本于吳中自能  
辨之 子京

先大父懷荊公遊雲間得趙文敏臨此本及琥珀盞官

案吐壺攜歸今僅壺存耳 元孫砢玉記

李伯時臨劉商觀奕圖

吳興篆書  
石刻宋榻

余所藏劉商觀奕圖繇唐迄今二百年絹素剝爛粉墨  
蕭瑟伯時為余臨之茅君勒之皆絕筆也噫劉商之畫  
非伯時則失其真伯時之筆非茅生則不能壽茅生之  
名豈以余言而遂傳歟 眉陽蘇軾謹識

七朝不廢劉商業翻刻重經四百年渺渺蟲絲尋寫法  
昏昏蜂翅影殘鐫熙寧寂寞風流遠兵火沉埋搨本傳

高館清秋低首玩晴窗自是拂雲烟 林屋蔡羽

宛轉纖紋如洛絲輕毫鈎刻兩精奇蕭蕭古墨含山色  
裊裊秋風亂客髭人世別來雲樹遠仙碁滅盡海田移  
滿窗晴日間披覆為補眉陽未詠詩 後學徐禎卿

詩品中唐識今名又逢圖刻愛精成柯嫌歲月還能爛  
碁怪神仙亦有爭山色照人殘墨在松陰彌石亂雲生  
紙膚細細窮毫末一試晴窗老眼明 長洲沈周

一模一刻足堪傳信補劉公未了緣物外形骸真玩世

山中樹木暗藏年但知對局相忘老不解旁觀也是仙  
我得細看增感慨怕拈枯筆續餘篇 義興李瀛

哲匠窮精能茲圖寶傳玩飛泉灑空中陟壁倚天半石  
床森雲霞厓松錯枝幹意到神具完絲縈縷不斷明牕  
目力竭白日烟靄亂桃源或避秦商山宜辭漢宛轉蓬  
壺通縹緲赤城貫棋枰一以覆日月凡幾換世途苦局  
促風燭易消散我欲從樵人重尋路迷漫神仙何有無  
盈襟徒浩嘆 中山湯珍

遺鱗蕭瑟緒遺刻對奕風流共宛然墨翟九攻奇似弱  
孟明三北殿爭先河山帶礪歸彈指日月虧盈易轉圜  
千載人間傳不朽品題坡老識龍眠

繭光對奕真傳壁鐵畫微銛妙隱鋒蟬蛻仙人今尚在  
龍眠高士邈難逢綺疏縈蚓雙蓬鬢院落遊絲一瘦筇  
天祿校讐瞻儔遠瑤編玉樹慰相從

右題劉商觀奕圖石刻時嘉靖四年冬十月望為余契  
重衡山文學士君乃郎壽承題壽承視余執行也請勸

勤勉為書此余意其年富學銳方擅盛聲于時則夷視  
余澁拙適不足為取不若緘致之學士君其有以相發  
籥不倦如昨壽承其知之余何能為後望之壽承其猶  
學士君也 隴西彭昉題

王伯穀云勒石者以臨書為易摹畫為難刻石畫圖自  
武梁祠堂而下僅僅數本余所見惟宋人所鑄劉商觀  
奕最為精絕毫髮絲縷纖微不移以為千載無兩 丁  
亥七夕同里冰鐵老人社弟駱雲程為玉翁盟兄校讐

時坐岳謙菴款雲堂中并記

珊瑚網卷二十六